

## **Kolosedan Poolbed Kolosedan Yaa Kerek Wongke Keendoon**

### *Kerek Kee Komo Dowad Wongkoon*

Dudi kedmengkandi kuu Kolose aom meneboon kowe, Pool kuu kerek kee Rom yaambéd wongkoon. Dudi kedmengkandi kuu: 1. Awinaab, anaab, dedmonaab andi ye amowamowiib, 2. Engyus kuu ari Yesu arebban ande kedmengkandiyiib, 3. Biknoon ye weng kanduwen andiyiib, 4. Okad yiri ye meeni kangdomiib kui. Kowe, Poolbed weng anammo Kolosedan yaa kedmengkande wongkoon. Wongkoon ye weeb kuu AD 60 areb.

### *Korok Weng*

1. Amun Kerundi Weng Ibduruk (1:1-2)
2. Kolosedan Yi Dowad Eso Ande Kurikuri Kami Ye Weng (1:3-14)
3. Keresu Kuu Korem Burudande Arimbed Anam (1:15-23)
4. Pool Anam Andiwendan Yi Dowad Deme Awinoon Ye Weng (1:24–2:7)
5. Nub Kuu Okad Yiri Ye Amowamob Yaa Kuu Keresumbed Dudboroone Obonmo Keruwen Ye Weng (2:8-23)
6. Karadmo Dobiri Kerekmen (3:1–4:6)
7. Yeenbon Kubendi Weng (4:7-18)

<sup>1</sup> Pool, ne kuu God ye dowaken yaambéd Yesu Keresumbed kinoona ye apaso keraan nub kuristen angkodmi Timoti yoom.

<sup>2</sup> Ma korondiyiibban Keresu yaa anam andimo doberembirimaib karadmodan Kolose aom doriib, yiib yaa kerek kee keenduub.

Kabamoon kondoon ye mimyob dowakeniib yewenubmo dobiriyiib kuu nuwambe God yaambad yiib yaa bangkandok.

*Yi Kurikuri Anam Andiwendan Yi Dowad*

<sup>3</sup> Nub kuu yiib dowad nub Yariman Yesu Keresu ye Ambe God yaa kurikuri kerembirimaub kuu ye yaa eso andimaub,

<sup>4</sup> amborom kuu Yesu Keresu yaa yiib anam andiyiib God ye karadmodan korem yaa yiib mimyob dowaken keendiyiib wengamburuwen kowe.

<sup>5</sup> Anam anam ye weng, weng amun kui, kuu yiib yaa ibduruk monoon kuu Godbed Ewen arimbed komarewa kamaneen anam andidan yi dowad kuu yiib wengambiriwen. Kowe, yiib anam andiyiib mimyob dowakeniib kuu kuye weng yaambad demboon. Kuye weng kunduk kuu, yiib kuu anam kandanuub ande meedmiib kii.

<sup>6</sup> Okad yimin yimin korem kuyaom kuu weng amun kee monoon areb kuu kwane yiib yaa monoon kii. Kwane, weng amun kee yiib kumaom kuu idiib irimaan, kwane kawiiib yeederebene kainderebimaan. Okad yimin yimin korem kuyaom kuu kwamunemo kamimaan. Kukuu yiib kuu weng amun kee aron ibduruk arimbed wengamberenib, Godbed kabamoon kondoon ye mimyob dowaken ye weng id anam korem yiibkaadkeriwen. Kaadkeriwen kumbad mene ari kuu yiib kuyaom kwamune areb kamiimaan kui.

<sup>7</sup> Yiib kuu nub deme mimo ye karub mimyob dowaken keenimaubman Epafras yaambéd yibkaadkeriwen. Ye kuu ma korondiyiibban kumbéd Keresu ye deme awinimaan nub dowad.

<sup>8</sup> Kwane, ye kuu yiib mimyob dowaken Kingkin Karadmo yaambéd keendimaib kuu nub yaa daandoon.

<sup>9</sup> Kwamune ye dowadbed ibduruk yiib dowad wengamburuwen kumbéd mene ari kuu yiib dowad womoniyiibban kurikuri kamimaub. God yaa kaamonimaub kuu kingkin ye kerekmen ye meeni kangdomiib kaadkeriyiib korem yaambéd ye dowaken yaa yibkaadkeri kuu yiib inamen aom dembok anduwed.

<sup>10</sup> Kwanikob, Yariman Yesu yaningko kankooni ye kerekmen yaambéd dobirime andi ye dowad kwane kurikuri kamuub. Yiib kuu kwane dobaraniib kuu yiib yaa kubi darewoob kamen-daneen. Kuye aningko kankooni kiwaan yena kuu, deme amunmo korem awinaniib kumbéd yowiib iriyiib, God yaa kaadkeri yaambéd kaine amniyiib,

<sup>11-12</sup> anam andi yaa erekmab anam ande doberembiri darewoowiib, yodbirimban iwarimbed doberembiri darewoowiib, kwamune bime andi ye dowad God ye aromkono nambiriyiib, ye kerekmen yaambéd aromkono korembéd aromniyiib, Ambe God yaa kubimo eso andiyiib, kui. Kuye God kuu nambirimo ye oonimbon aom ye karadmodan yi yumbon kuu yiiwiib ibmo dohiri dowad yiib yaa yiminmo kerundoon.

<sup>13</sup> Ye kuu kumunmo ye oonimbon yirimbed nub

ben yaro ye mimyob dowaken keenoon ye Mingki ye oonimbon aom yuroon.

<sup>14</sup> Kuye Mingki kuyaambed nub kuu bidoon, kukuu nub ambarakmi kuu are nonondandoon kui.

*Yesu Keresu Kuu Kane?*

<sup>15</sup> Yesu kuu wedmenindeban ye God ye kuru korokboon, ye kuu wonob dana mingki areb, ongmenaboon ye kumkam korem kuu yirimo, yembedmo kuu ari.

<sup>16</sup> Amborom kuu ye yaambed kumkam korem kuu ongmenaboon kowe. Kumkam korem, Ewen ariyiib okad yiriyiib, wedmuuwiib wedmokbaniib, korok korok yi ooni yaromkono o aromkono maa maa ye yumbon o yarian yi yumbon o korok korok deme ye aromkono ye yumbon kwamune awene kui, korem kuu ye yaambed ye dowad ongmenaboon.

<sup>17</sup> Ye kuu yedin doboroonkob kumkam korem kuu ye yomanbed kwane dembe wonoon. Yi kuu ye yaambed yiminmo doriib.

<sup>18</sup> Kwane, anam andiwendan kuu ye id areb, ye kuu yi korok kui. Ye kuu bobnoon yirimbed ibduruk dembekore wonob dana keroon, kowe kumkam korem yaa yembedmo kuu ari.

<sup>19</sup> Amborom kuu God ye kubi dowaken keroon kuu ye meeni koremiib inamen koremiib dowaken koremiib aromkono koremiib Yesu ye niindem aom angkeen kowe.

<sup>20</sup> Kwane, Yesu yaambed God kuu yeka ye yaa kunum keru ye kiwaan ongmoon, okad yiriyiib Ewen ariyiib korem ongmenaboon yi dowad. Kiwaan ongmoon kuu bon dowan keru yeman, ye

umkan at ming arimbed onduknoon yaambéd ongmoon.

<sup>21</sup> Anukbed yíib kuu God yaa ambabbed doberenib God ye bondan keríwen, amborom kuu yíib meeni yíib kami yíib kuu arewamo kowe.

<sup>22</sup> Kumban kibikee yíib kuu God yaa kunum keríwen, Keresu ye id bobnoon yaambéd. Kwanoon kuu yíib kuu karadmo ongmen doka ye murubia arimbed demkoronmoyíib yíib yaa ambarakmiwen kii ande dedmone daandiyíibbaniib dobirime anded.

<sup>23</sup> Kumban yíib anam andi kumbed doberembaraniib kuu kwamunemo keraniib kumbedmo. Yíib anam andi kuu yumburum ambab yiri kawenebe awingkanabemoon areb keríwe, weng amun aombéd Godbed kwananeen ande meedmi kuyaambéd ben kimyen winindo kumbed kui. Kuye weng amun kuu yíib wengambiriwen, kwane weng amun kee okad yimin yimin yaa doriibdan yaa daandiwen, kwane weng amun keye deme karub keraan, ne Pool.

### *Pool Ye Deme Anam Andiwendan Yi Dowad*

<sup>24</sup> Kwane, ne kuu yíib anam andiwen ye dowad yaambéd durud yewediib kandaan kowe kubaan. Kwane, yimin kerindo ye durud yewed kuu ne id yaa yimin kere weneen, Keresu ye durud yewed ye kerekmen yaambéd. Kukuu anam andiwendan yi dowad, yi kuu Keresu ye id kui.

<sup>25</sup> Godbed deme kawoone anam andiwendan yi dememan keraan kuu, yíib yaa God ye weng yiminmo korokbendok anded.

<sup>26</sup> Weng kee kurin kurin yirimbed yemyeb kanbiknoona angkimboroona awoya yi awoya ma wedmindo kumbed mene ari kumban, kibikee God ye karadmodan yaa korokbendoon.

<sup>27</sup> Id darewoob ye weng nambiriyiib anukbed biknoon kee nub yaa monoon kuu, Godbed meeni ongmekore ambibkin koremdan kuyaom korokbendoon kuu Keresu kuu yiib niindem aom doreen. Ye yaambed God ye nambiri aom dobaranuub andi ye meedmi yeman.

<sup>28</sup> Kwane, nub kuu Keresu ye dowad dakme korokbendimaub. Nub kuu meeni kangdom korembed nimakarub korem yaa ongkandenub kedmengkandimaub, nimakarub korem kuu Keresu yaambed demkoronmo keribka God ye kerebiri ari benmene bangkanem andi ye dowad.

<sup>29</sup> Kuye dowad ye aromkono korem kawoon kumbed bamdaane ambangkimain. Kuye aromkono kuu ne yaambed deme darewoob ambangkimaan.

## 2

<sup>1</sup> Ne dowaken yiibkaadkerime andid, yiiwiib Laodiseadaniib ne ma wengawindodaniib yiib korem ye dowad ninabe naawonmo ambangkimain.

<sup>2</sup> Ne kee kwamako, yiib niindem aom aromne kubiyiib doberenib, kwane mimyob dowaken yaambed kan mimo kerime. Kwananiib kuu God ye weng kanbiknoon kuyaa kaadkeri kumundinmo kere karekmiyiibban kere amun kerundi darewoob arimbed kandaniib. Kuye weng kanbiknoon kuu Keresu ye kui.

<sup>3</sup> Ye aommo kuu meeni kangdom koremiib kaadkeri koremiib ye amun kerundi darewoob arimbed kuu bikdereboon.

<sup>4</sup> Kee kwane yedmaan kuu yenambed mene weng amun areb kumban id angkara kuu arewa kumbed ma nemengkande birandaib andi ye dowad.

<sup>5</sup> Amborom kuu wuruk kuu ne kuu yiiwiib yaa dorokban kumban, ne mimyob aom kuu yiib yoom doriin kowe. Kwane, yiib konomdangmo nekdane dobiriyiib Keresu yaa anam andi kangdommoyiib wedme kubaan kii.

### *Yesu Keresu Yaamo Kwane Doberembiri*

<sup>6</sup> Kwani kowe, yiib kuu Yesu Keresu nende yiib Yariman keriwen kwamune areb kuu, ye kiwaan yaambad winime.

<sup>7</sup> Ye niindem aombed yiib kuu yumburum kaare kaine amnenib, yiib yaa komarewa kedmengkan-duwen areb kuu yiib anam andi kuu aromnibka, yiib niindem aom kuu kube eso andiyiib muubne derendarok.

<sup>8</sup> Kudi wedmime, yenambad okad kiri yi meendobi aombed meneboon ye wengiib dudi idiibban ye wengiib yaambad yiib ben ye dabderem yiri nongkobaib andid. Kuye weng kuu karub ye amowamowiib kingkin yi aningko kankooni ye amowamowiib yaambad menebimaan, Keresu yaambadban.

<sup>9</sup> Kedi, Yesu Keresu kuu God ye meeni koremiib inamen koremiib dowaken koremiib aromkono koremiib doreen, kwane okad yiri doboroon kwamunemo.

<sup>10</sup> Kwane, Keresu yaambéd ye meeni koremiib inamen koremiib dowaken koremiib aromkono koremiib kuu yíib yaa bangkandoon. Ye kuu aromkono maa maa korem awinidaniib korok maa maa koremiib yi korok kui.

<sup>11-12</sup> Yíib anam andiwen yaambéd Yesu bobnoon yirimbed nen demboon ye God ye aromkono yaa yíib kuu baptais keríwen kuu, Yesu yoom mangkene ye yoom ben dembemoon areb keríwen. Kwaniwen kumbed kad wanabemoon areb Yesu yaningko yaambéd yíib id ye dowaken kuu wankoraron. Kuku karubbedban Keresumbed kwanoon.

<sup>13-14</sup> Kwane, anukbed yíib ambarakmi kuyíib yíib id ye dowakenbed yíib oonoon kuyíib yaambéd yíib kuu duknemoon areb dohiriwen. Kuyaron kuu Godbed Keresu kwamune areb yíib kuu ongmoone wadkeríwen. Godbed ambarakmi ye kakman kondi ye weng wongkooniib Moses yoom amob ongmooníib kuu nub yaa manmo keroon. Kumban kuye weng kuu Godbed benwene at ming arimbed bakumbed kaare kinoon kumbed, nub ambarakmi korem kuu are nonondandoon.

<sup>15</sup> Kwane, Godbed aromkono maa maa korem awinidaniib korok maa maa koremiib bongme yi aromkono kankorarekore, Yesu komo kamoon yaambéd nangbe burudandoon korokbi dowad yi kuu wedangkumbed ben yi aromkono dowan kii ande damangkanden yaron.

<sup>16</sup> Kwana kowe, yíib komo ok o animan animaib o kurikurimbon o Sabat aron arimbed komo kamimaib kuye dowadbed yíib kwane korondaiwe karub yenambéd yíib benwene



wengyundandaib.

<sup>17</sup> Keyeman kee kuruwakmo, amaan ari kwane menebaneen andi ye kumunkingki yeman. Kum-ban anam anam yeman kuu Keresu yaambedmo.

<sup>18</sup> Karub kane kuu yekareb kankubuni ye dudi inameniib engyus yaa kurikuri keriyiib yaa kube kamimaan kumbed, yiib kuu yiib trofi kandaib andi dowad yiib ben abdon wanandameen kuu kebenime. Kuye karub kuu komo wedmoon kuye dowad weng miin doboob kerengkan dakmi-maan. Kwane, ye kuu Kingkin Karadmo ye kerek-men yaa dorokban kowe, yeka ye inamenbed in-amen ogoodmo maa maa bangkande kerengkan kere doreen.

<sup>19</sup> Ye kuu Korok Yesu yaa wini ye kiwaan kuu nonondandoon. Nub Korok kee ye id kuu nub kuristendan kui, ye yaambed id kumund-inmo kuu ingkanabooniib mekmeediibbed ko-romone ingkananmo wonoon kuu, Godbed ye dowaken komarewa kere kainok ande meeni-maankob kaine winimaan.

<sup>20</sup> Yiib kuu Keresu ibmo keriwenkob okad yiri dobiri ye amowamowiib yaa duknemoon areb keriwen kowe, komande okad yiridan areb kuye amowamob ye dabderem yiri dobirimaib? Amowamob kuu kei.

<sup>21</sup> Kee awinaib, kee mokwaraib, kee dedmon-aib, kui.

<sup>22</sup> Keye amowamob awene kee ben awingkaniib kuu ma idiib keraanban, amborom kuu kuye amowamob kuu nimakarub yi kwanime ye wengiib nimakarub yi kedmengkandiyiib yaambed demboon kowe.

<sup>23</sup> Kuye amowamob kuyaa wedmaniib kuu

meeni kangdom areb ande meenaniib, yika yi inamenbed kurikuri amowiib yika dabderem yiri kankubuni ye dudi inameniib id yaa kamkonomo keru ye inameniib kowe. Kumban kuye amowamob kuu aromkonoyiibban kowe id ye dowaken yaa ma kebenindeban.

### 3

#### *Karadmo Yaambad Dobiri Ye Kerekmen*

<sup>1</sup> Yiib kuu Keresu yoom ibmo ben demboondan kowe, inamen arimo awine kande doberembirime, Keresumbed God ye wiwi angkambad dibeen ye inamen kui.

<sup>2</sup> Yiib meeni korem kuu bene kandunib inamen ari yaamo kiribenib meendobime, okad yiri ye inamen yaamban.

<sup>3</sup> Amborom kuu yiib kuu kwane dukniwena yiib wadkeri kuu Yesu Keresu yaa daboknenib ibmo bikniwen, Godiib aom bikne angkeen kowe.

<sup>4</sup> Yiib wadkeri anam kuu Yesu Keresu kowe, aron kwane ye kuu mene angkadaraneen ari kuu yiib kwangkong ye yoom ibmo nambiriyiib angkadaraniib.

<sup>5</sup> Kwana kowe, yiib id ye dowaken ye inamen korem kuu ben kirarundime, nenem kami ye inameniib anon dowomkim yaa doberemoon areb ye inameniib nenem kami ye moomiib meeni dowaken miin arewayiib yiribman yemoon bi ye inameniib kui. Yiribman yemoon bi ye inamen kuu God kankubune yiribman kankooni ye inamen.

<sup>6</sup> Kuye inamen korem kuu meneboon kowe, God ye norin arewa wadi yaron kuu mananuun kii.

<sup>7</sup> Kuye inamen korem kuu yiid kuu anuk yiri awine kande doboriwen, anam andindo yaron kui.

<sup>8</sup> Kumban kibikee keye inamen awene kuu yiid niindem aom ben kirarundime, noriniib arud naawoniib inamen miin arewayiid wengamborokbanabiyyid weng komyengiib kui.

<sup>9</sup> Kwane, yiid kuu neman dudanoon dudanoon kamaib, amborom kuu yiid kuu anuk yiri dobori ye kerekmeniib kuye kamiyyid yaa kuu koronde kirarundekorib,

<sup>10</sup> dobori yeweb awine kandiwen kowe. Kuye dobori yeweb kuu kuye dobori kiwaan ongmoon ye God areb kere ye yaa kaadkeri yeman.

<sup>11</sup> Kuye dobori kerekmen yaambed andokbe yeka yekayiidban, Gurikdan kuu yika Yuudan kuu yika kuyiidban, kad wandiwendan o kad wandindodan kuyiidban, ambibkin maadan kuu dobori arewa andi yemanban o ambibkin maadan kuu inamen miin arewa andi yemanban, yena yi dabderem yiri dobere no deme awinembiridan o yika oone obonmo doriibdan kuyiidban kui. Kedi, Keresu kuu meeni darewoob arimbed, kwane ye kuu ye karuwa nimaya korem yi niindem aom doreen.

<sup>12</sup> Kwana kowe, yiid kuu Godbed kingkane yeka ye dowad ben yuroondan, yiid kuu yembed mimyob dowaken darewoob keendoon kowe, mimyob keendiyiid awandiyiid yiidka kankubune yena kuu arimo andiyiid ingmiyidban nangkemmo doboriyiid yodbirimbam emamombed meedme doboriyiid kuu yiidka inware dobirime.

<sup>13</sup> Kwane, yiiibka kwamune awiniiwo nub kwangkon awinuuwo kaminok andime. Kwane, neman komo ambarakmewen korondaan kii ande nonondandoko neman komo ambarakmoon kwangkon kwane nonondandoko kamenabime. Yarimanbed yiiib ambarakmi yaa kuu are nonondandoon kwamune areb kuu, yena yi ambarakmi yaa are nonondandime.

<sup>14</sup> Kuye inamen amun awinibka ari kuu mimyob dowaken keendime. Kwananiib kumbed yiiib kuu dabokne mimo anammo keraniib.

<sup>15</sup> Kwane, korondiiwo Keresu ye yewenubmo kumbed yiiib niindem aom dawuro oonendok, amborom kuu yiiib kuu id mimo keriwen kowe yewenubmo dobiri dowad yiiib yaa baande ki-noon. Kwane, eso ande dobirime.

<sup>16</sup> Meeni kangdom korem yaambéd neman kedmengkane ongkanoon kedmengkane ongkanoon kamibko, yiiib niindem aom kubi dowakeniib kumbed God Ye Weng ye yookiib God yaningko kankooni yookiib kurikuri yookiib wingkanabime. Kwamibko, Keresu ye weng amun kumbed yiiib niindem aom yiminmo muubnok.

<sup>17</sup> Kwane, weng dakmi yaambéd o ambangki yaambéd, komo komo awine kamandamiib korem kuu, Yariman Yesu yaambéd Ambe God yaa eso andenib Yesu yaningko yaambéd kwane ambangkime.

### *Kuristendan Yi Dobiri Kiwaan*

<sup>18</sup> Nima awadmiwendan, yiiib kuu yiiib karub yi dabderem aom dobirime, kukuu Yariman ye dowaken yaambéd inamen amunmo kowe.

<sup>19</sup> Karub awadmiwendan, yiib kuu yiib nima yaa mimyob dowaken keendime, yi yaa kena karunga kamaib.

<sup>20</sup> Dana, yiib ena ambe yi weng korem wengambere awinime, amborom kuu kwamaniib kumbed Yariman kuu kubaneen kowe.

<sup>21</sup> Awodkia, yiib kuu yiib dana yaa deekni weng daandaib, kwane daandaniib kuu yi kubi dowaken kuu biknaneen.

<sup>22</sup> Yena yi dabderem yiri dobere no deme awinembiridan, yiib kuu okad yiri yiib kangkodan yi weng korem wengambere awinime. Korok yi indob ari kumbedmo amun ambangkubko nub yaa kerengkandime ande meenaib, inameniib ambangkiiyiib mimo keru ye inameniib Yariman yaa uniyiib kumbed yi deme awinime.

<sup>23</sup> Komo kamiib kuu yiib inamen koremiib kwane ambangkime. Nimakarub yi dowadban Yariman ye dowad ambangkemoon areb kwane ambangkime,

<sup>24</sup> amborom kuu yiib yiibkaad kwane ambangkaniib kuu Yarimanbed kakman kondaneen, Ewen ari yiib dowad kowi yeman. Kedi, Keresu kuu yiib Yariman keroone ye deme ambangkimaib kii.

<sup>25</sup> Kumban, karub kanembed ambarakmaneen kuu kuye dowad kakman kuu Godbed konaneen, kedi, karub kane kuu yaningko darewoowiib o embengiib kuu God kuu ma meenimokban kowe.

## 4

<sup>1</sup> Kangkodan, yiib dabderem yiri dobere no deme awinembiridan yaa kuu yorokmo inameniib ibmo keru ye inameniib yaambad

kamime, amborom kuu yiid yiidkaad yiid Kangkoman Ewen ari doreen kowe.

*Ari Ongki Weng Yenayiid Dakmoon*

<sup>2</sup> Yiid kuu kurikuri keru ye inamen darewoob kere kwane kame doberembirime, kerekberenmo dobiriyiid eso andiyiid kii.

<sup>3</sup> Kwane, nub dowad kwangkun kurikuriyiid kamendime, kwane Godbed ye weng amun ye dowad nub yaa kiwaan nandok. Ye weng amun kuu God ye inamen biknoon kuu Keresumbed korokboon ye weng kuu nubbed kan ari ked-mengkandenmo yari yeman. Kuye dowadbed ne kuu nende sein nongbed yenbiwenkob dibiin.

<sup>4</sup> God ye weng amun daandi kee kwanaked yimin kowe, yiid kuu kurikuri kamibko dian-bonmo dakma.

<sup>5</sup> Aron denekmen angkimboroka ma korondiyiibban kumbed yiidbed inamen kangdommo ye kerekmen yaambbed bunangka doriibdan yaa kamime.

<sup>6</sup> Yiid weng dakmi kuu korem kabamoon kondoon ye mimyob dowakeniib, amunmo karam ambod areb kerok. Kwananiib kuu nimakarub mimim korem yaa komarewa inandi yiidkaad-keraniib.

*Yeenbon Weng*

<sup>7</sup> Taikaikusbed ne weng korem kuu yiid yaa kanmene dakmaneen kii. Ye kuu mimyob dowaken keenimaub ye kuristen angkodmi, ye kuu ma korondiyiibban God ye deme awini ye karub, ye yoom ibmo Yariman yaambbed deme awinuwenman kui.

<sup>8</sup> Ye kuu nenkowaana yiiwiib yaa ku monoon kui, menene nub yaa komarewa keroon ye weng dakmi dowadiiwa, angkon yiib niindem aom kuu aromne kubi dowakeniib kondi dowadiiwa, kumbedmo.

<sup>9</sup> Ye kuu Onesimus yoom ku meniib kui. Onesimus kuu mimyob dowaken keenimaubman, ye kuu nub kuristen angkodmi ma korondiyiibbanman, ye kuu Koloseman, yiib mimo yiibkanmo kui. Yi ayoobbed keyaambed komo komo keroon ye weng korem kuu yiib yaa daandaniib kii.

<sup>10</sup> Ibmo wii awunuwen ye karub maa yaningko Aristaakusbed kubendi weng yiib yaa keendoon. Baanabas ye mongkob Maak ye kwangkon kwane keendoon. Yiib kuu ye yaa komarewa awanenime ye weng kuu kandiwen kowe, yiiwiib yaa monoka kubenime.

<sup>11</sup> Yesu yaningko maa Yustus ye kwangkon kubendi weng yiib yaa keendoon. Keye karub ayoozmim kee Yuudan, God ye oonimbon ye deme awinimaubdan kumaom kuu, Yuudan yenayiibban. Anam kuu karub ayoozmim kee ne mimyob wandi kankubune kubi dowakeniib kawiwen kii.

<sup>12</sup> Epafras, ye kwangkon Koloseman, yiib mimo yiibkanmo, kwane ye kuu Yesu Keresu ye dememan, ye kuu kubendi weng yiib yaa keendoon. Ye kuu yiib dowad naawonmo kurikuri kamembirimaan, kingkin kerekmen yaambed amnekorib ma karekmiyiibban kerekorib God ye inamen dowaken korem yaambed kangdommo doberembirime anded.

<sup>13</sup> Nembed ye dowad weng anam ke dakme korokbaan kei, yiib dowad deme yobdood awinem-

birimaan, kwane Laodisea aom doriibdaniib Hieraopolis aom doriibdaniib yi dowad kwangkon.

<sup>14</sup> Nub mimyob dowaken keenimaubman dokta Luk yoom Demas yoombed kubendi weng yiib yaa keendiwen.

<sup>15</sup> Ne kubendi weng kuu anam andiwendan Laodisea aom doriib yaa kondime. Kwane Nimfa yoom anam andiwendan yu ambiwoom nedbi-maib yaa kwangkon kondime.

<sup>16</sup> Kerek kee kandenib kanwene yiib kurikuri ambiwoombed kimingkaniib ye yondem kuu, anam andiwendan Laodisea aom doriib yaa kondime, yi kurikuri ambiwoombed kimingki dowad. Ne kerek yi yaa wongkaan kwangkon yi yaambed kanmene yiib kurikuri ambiwoombed kimingkime.

<sup>17</sup> Aakipus yaa yedmenime, “Yarimanbed eb yaa deme kabdoona awine kandewen kuu awine down kere, kuyaa korondaab.” andime.

<sup>18</sup> Pool, neka ne dingkimbed kubendi weng kee wongkaan kii. Ne kuu nende sein nongbed yen-biwenkob dibiin kuu monkone meenime. God ye kabamoon kondoon ye mimyob dowaken kuu yiib yaa kerok.



**Buk Baibel long tokples Yongkom  
Genesis, Psalms, and The New Testament in the  
Yongkom Language (also called the Yonggom  
language) of Papua New Guinea**

copyright © 2003 The Bible Society of Papua New Guinea

Language: Yongkom

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 18 Apr 2025 from source files dated 31 Aug 2023

b3f9b0a2-8cdb-5470-8e3c-8250231eee99